

## Mensahe 4

### **Ang Pagpahiuli sa Pagtukod sa Balay sa Dios pinaagi sa Diosnong Pagdasig sa Mga Propeta sa Dios**

Basahong Kasulatan: Esd. 5:1-2; Hag. 1:2-5, 7-8, 9b, 14; 2:6-7, 9a, 23; Zac. 3:9;  
4:2-7, 11-14

- I. Sa pagtukod pag-usab sa nahiuling templo nga balay sa Dios, medyo naluya ug nabugnaw si Josue (nagrepresentar sa pagkasacerdote) ug si Zorobabel (nagrepresentar sa pagkahari); busa, gigamit sa Dios ang mga propeta nga si Hageo ug si Zacarias sa pagpamulong alang Niya aron sa paglig-on, pagtabang, ug pagdasig ni Josue ug ni Zorobabel—Esd. 5:1-2; itandi sa 1 Cor. 14:3.**
- II. Ang sentrong hunahuna sa panagna ni Hageo mao nga ang pagtukod sa balay sa Dios, ang templo sa Dios, may kalabotan sa kayohan sa katawhan sa Dios karon ug sa moabot nga gingharian sa millennium uban sa Mesias niini sa panahon sa pagpahiuli—Hag. 1:2-5, 7-8, 9b, 14; 2:6-9, 20-23; Mat. 19:28; Buh. 3:20-21:**
  - A. Sa Daang Tugon ang balay ni Jehova, o ang templo, una hulagway ni Cristo nga balay sa Dios sa tinagsa, ug unya hulagway sa iglesia, sa Lawas, sa nidakong Cristo, nga balay sa Dios sa hiniusa—Juan 2:19-21; 1 Tim. 3:15.
  - B. Kay hulagway man sa iglesia ang balay ni Jehova, nagpasabot nato, nga mga magtutuo sa Bag-ong Tugon, ang panagna ni Hageo, kay kita man ang realidad sa hulagway.
  - C. Ang pagpamulong ni Hageo ngadto ni Zorobabel nga gobernador ug ni Josue nga labawng sacerdote paglig-on ug pagdasig man kanila ug sa katawhan aron magtukod pag-usab sa templo nga balay sa Dios—Esd. 5:1; Hag. 1:1.
  - D. Ang nag-alagad-sa-kaugalingon ug nagsalikway-sa-Dios nga namauling mga binihag nagtagad sa ilang mga balay apan wala magtagad sa balay ni Jehova (v. 4); nagpasabot ang pulong *nanagan* sa versiculo 9 nga nabisi ang mga tawo sa pagtagad sa kaugalingon nilang mga balay.
  - E. Nagpakita ang Hageo 1:6 nga kon pasagdan nato ang iglesia, wala tay tinuod nga pagpahimulos o katagbawan; kalabot sa pagpahiuli sa pagtukod sa balay sa Dios, dili gyod mahimong mag-nyutral ta; kinahanglan bug-os gyod ta, magtagad ba una sa atong mga balay, o magtagad una sa balay sa Ginoo—Mat. 6:33; Luc. 9:57-62; Fil. 2:20-21.
  - F. Alang sa pagpahiuli sa pagtukod sa balay sa Dios, gidasig ang mga pinili sa Dios diha sa ilang espiritu ug nangadto sila ug nibuhat diha sa balay ni Jehova; sa pagtubag nato sa sugo sa Ginoo, maokupahan gyod unta tang tanan ni Ginoong Jesus sa buhat sa pagsangyaw sa ebanghelyo, pagpakaon sa bag-ong mga magtutuo, ug pag-atiman sa uban aron matukod ang balay sa Ginoo, ang iglesia nga Lawas ni Cristo—Hag. 1:14; 2:7a; Juan 21:15-17.

Mensahe 4 (sumpay)

- G. “Uyogon Ko ang tanang nasod, ug moabot ang Tinguha sa tanang nasod”—Hag. 2:7a:
1. Nagpasabot kini ni Cristo, nga maoy Tinguha sa tanang nasod; bisan wala makaila ni Cristo ang mga nasod, nagtinguha gihapon sila ni Cristo; kanang nagtinguha ang mga nasod nianang mga butang sama sa kahayag, gugma, kalipay, ug pagkamatarong, nga ang realidad mao si Cristo, nagpasabot nga, sa walay pagkamatikod, nagtinguha sila ni Cristo—Mal. 3:1b.
  2. Ang pag-abot ni Cristo isip Tinguha sa tanang nasod nag-agad sa pagpamauli sa katawhan sa Dios gikan sa ilang pagkabihag sa Babilonia ug sa pagpahiuli sa pagtukod sa balay sa Dios—1 Tim. 3:15; 1 Ped. 2:5.
- H. “Pun-on Ko sa himaya kining balaya...Molabaw pa ang ulahing himaya ning balaya sa unang himaya”—Hag. 2:7b, 9a:
1. Naa sa balay sa Dios, sa balay ni Jehova, ang himaya sa Dios, ang pagpadayag sa Dios—Exo. 40:34-35; 1 Hari 8:10-11; 2 Cron. 3:1; 5:1-2, 13-14; Efe. 3:21; Bug. 21:10-11.
  2. Sa panan-awon sa Dios, nakita ni Ezequiel ang himaya ni Jehova nga nibalik sa balay ni Jehova ug nilukop sa balay (Ezeq. 43:1-5); nibalik sa balay ang himaya ni Jehova kay nahuman na man ang pagtukod sa balay (vv. 2, 5); nagpakita kini nga aron mopuyo sa iglesia ang Dios sa himaya, tukoron gyod ang iglesia aron mahimong puluy-anan sa Dios (Efe. 2:21-22; 3:14-21).
  3. Nakita ni Ezequiel nga ang suba sa tubig sa kinabuhi nga niagay gikan sa balay sa Dios niagay paingon sa silangan, sa direksyon sa himaya sa Dios (Ezeq. 47:1; 43:2); kon dili ta magtagad sa himaya sa Dios, malimitahan ang agay dinhi nato.
  4. Sa iglesiahanong kinabuhi ang una gyod natong tagdon mao ang himaya sa Ginoo; ang mga desisyon diha sa iglesiahanong kinabuhi himoon gyod, una sa tanan, sumala sa himaya sa Ginoo—Efe. 3:21; 4:20; 1 Ped. 4:10-11; Jud. 24-25.
  5. Ang paghimaya sa Dios maoy tuyo sa atong pag-alagad; ang kinalabwang pag-alagad nga mabuhat nato sa Dios mao ang paghimaya nato sa Dios sa pagkinabuhi nato sa kinabuhi sa Dios-tawo (Isa. 43:7; Juan 7:16-18; 17:1-4; Rom. 9:21, 23; Fil. 1:19-21a; 1 Cor. 6:19-20; 10:31); buhaton nato kini aron hiniusa, tinukod nga mapadayag nato ang Dios ug makasulod ta sa pagkausa diha sa diosnong himaya (Juan 17:22-24).
- I. Ang paghimo ni Jehova ni Zorobabel nga singsing nga igtimbre (Hag. 2:23) nagpakita nga giisip siya ni Jehova nga representante Niya ug nga nahigugma ug nisalig Siya niya; ning bahina hulagway si Zorobabel ni Cristo, ug Siya ang gihigugma ug gisaligan sa Dios (Mat. 3:17; 17:5; Juan 3:35; 17:2); kay ingon niana man nga persona, takos si

## Mensahe 4 (sumpay)

Cristo nga mangatiman sa pagtukod sa balay sa Dios, sa iglesia (Mat. 16:18).

### III. Gipadayag sa basahon sa Zacarias nga ang pito ka suga sa tangkawan (4:2; Bug. 4:5) mao ang pito ka Espiritu sa Dios, ang Espiritu nga gipakusgan sa pito ka pilo (1:4), nga pito ka mata ni Jehova (Zac. 4:10), ang pito ka mata sa Corderong nagtubos (Bug. 5:6), ug ang pito ka mata sa batong inugtukod (Zac. 3:9) aron hingpit nga mapadayag ang Tulo-usang Dios ug matukod pag-usab ang balay sa Dios:

- A. Ang bato nga gipahamutang sa atubangan ni Josue sa Zacarias 3:9 naghulagway ni Cristo nga bato alang sa pagtukod sa Dios (Sal. 118:22; Mat. 21:42); nagpakita ang pagkulit ni Jehova sa bato nga sa himalasyon si Cristo didto sa krus, gikulit, giputol, Siya sa Dios; ang pagkuha ni Jehova sa kadaotan sa yuta sa usang adlaw nagpakita nga kuhaon ni Cristo, nga Kaniya nagbuhat ang Dios, ang sala sa yuta sa Israel sa usang adlaw, sa adlaw sa pagkalansang Niya sa krus; pinaagi sa kamatayon Niya sa krus, gikuha ni Cristo, nga Cordero sa Dios, ang sala sa kalibotan (1 Ped. 2:24; Juan 1:29):
1. Usa ra ang bato, si Jehova, ug ang Cordero; si Cristo ang Corderong nagtubos ug ang batong inugtukod, ug Siya sab si Jehova; si Cristo ang Cordero-bato—ang Cordero alang sa pagtubos ug ang bato alang sa pagtukod—Bug. 5:6; Zac. 3:9.
  2. Sa pagtukod sa Dios si Cristo ang batong patukoranan nga mo-suporta sa balay, ang bato sa pamag-ang nga modugtong pag-usa sa mga Gentil ug mga Judiong bahin sa Iyang Lawas, ug ang ulohang-bato sa grasya nga mohingpit sa tanang butang sa balay sa Dios—Isa. 28:16; 1 Cor. 3:11; Efe. 2:20; 1 Ped. 2:6; Zac. 4:7.
  3. Sa kamatuoran nga si Cristo, ang Cordero sa Dios, mao ang batong inugtukod nga dunay pito ka mata, nagpadayag kini nga ang pito ka mata ni Cristo alang gyod sa pagtukod sa Dios—Juan 1:29; Zac. 3:9; Bug. 5:6.
  4. Si Cristo ang batong inugtukod nga dunay pito ka mata, ang pito ka Espiritu, aron ipalatay ang Iyang Kaugalingon kanato aron matransporma ta nga bilihong mga materyal alang sa pagtukod sa Dios; samtang nagtan-aw ang Ginoo kanato, gipalatay Siya sa Iyang pito ka mata nganhi nato—Zac. 3:9; 1 Cor. 3:12a; Bug. 3:1; 5:6.
- B. Aron mahuman ang pagtukod sa Dios, ang Espiritu nga gipakusgan sa pito ka pilo mao ang mga mata ni Cristo nga Corderong nagtubos ug batong inugtukod aron maniid ug mosusi nato ug ipatuhop ug ipalatay kanato ang elemento, kadato, ug luwan ni Cristo alang sa pagtukod sa Dios—Zac. 3:9; 4:7; Bug. 1:14; 5:6:
1. Gipatuhop sa pito ka mata sa Cordero kanato si Cristo nga balaod-

#### Mensahe 4 (sumpay)

nong Manunubos, ug gipatuhop sa pito ka mata sa bato kanato si Cristo nga organicong Manluluwas alang sa mapatigayonong lihok sa Dios dinhi sa yuta pinaagi sa balaodnong katubsanan Niya ug sa organicong kaluwasan Niya alang sa tumong sa Iyang pagtukod—Juan 1:29; Buh. 4:11-12; Rom. 5:10.

2. Duna tay duha ka suga sa sulod nato—ang Espiritu sa Dios nga gipakusgan sa pito ka pilo sulod sa atong espiritu (Prov. 20:27; Bug. 4:5; 1 Cor. 6:17); aron matransporma, hingpit gyod tang mobukas sa Ginoo sa pag-ampo aron pasusihon ang suga sa Ginoo ug ang pito ka suga sa kalayo sa tanang lawak sa atong kalag, pasidlakon ug pahayagon sa mga bahin nato sa sulod aron sangkapan kinig kinabuhi.
  3. Ang tawong nakasinatig kinadak-ang pagtransporma mao ang tawong hingpit nga nibukas sa Ginoo; tungod sa pagbuhat sa Espiritu nga gipakusgan sa pito ka pilo sulod sa matinguhaong mga magtutuo ni Cristo, gipakusgan sila aron mahimong mga mananaog nga motukod sa Lawas ni Cristo, nga mahingpit sa Bag-ong Jerusalem.
- C. Sa pagkabanhaw ni Cristo, Siya nga kataposang Adam, nahimong Espiritung taghatag-og-kinabuhi (15:45b; Juan 6:63a; 2 Cor. 3:6b), nga mao sab ang Espiritung gipakusgan sa pito ka pilo; kining Espirituha mao ang Espiritu sa kinabuhi (Rom. 8:2); busa, ang kagamitan sa pito ka Espiritu pagpaambit man sa diosnong kinabuhi ngadto sa katawhan sa Dios aron matukod ang walay kataposang puluy-anan sa Dios, ang Bag-ong Jerusalem.
- D. Ang Espiritu nga gipakusgan sa pito ka pilo mao ang pito ka suga sa kalayo nga mosunog, mohayag, mobutyag, mosusi, mohukom, moputli, ug moulay nato aron mapalugwa ang bulawang mga tangkawan para matuman ang pamatigayon sa Dios sa Bag-ong Tugon—Bug. 4:5; 1:2, 4, 9-12, 20.
- E. Ang duha ka kahoyng olivo sa duha ka kilid sa tangkawan nagtimaan ni Josue nga labawng sacerdote ug ni Zorobabel nga gobernador niadtong panahona, nga mao ang duha ka anak nga lalaki sa lana, nga napuno sa Espiritu ni Jehova alang sa pagtukod pag-usab sa templo sa Dios—Zac. 4:1-6, 11-14:
1. Ang duha ka anak nga lalaki sa lana naghulagway sab sa duha ka saksi, ni Moises ug ni Elias, sa kataposang tulo ug tunga ka tuig karong panahona, nga mga saksi sa Dios sa dakong kasakitan aron molig-on sa mga katawhan sa Dios—sa mga Israelinhon ug sa mga magtutuo ni Cristo—Bug. 11:3-12; 12:17.
  2. Sa prinsipyo, mga anak nga lalaki sa bag-ong lana gyod unta ang tanang magtutuo ni Cristo, ang mga napuno sa bag-o, naa-karon, ug nahingpit nga Espiritu isip lana sa kalipay, nga mopaagay sa Espiritu ngadto sa tangkawan alang sa nagsidlak nga panghima-

#### Mensahe 4 (sumpay)

tuod niini, ang panghimatuod ni Jesus—1:12, 20; Sal. 45:7; 46:4; 92:10; Juan 7:38:

- a. Ang iglesia nga tangkawan mao ang lig-ong pagkalawas sa Tulo-usang Dios nga dunay Espiritung gipakusgan sa pito ka pilo nga mao ang lana sa Dios diha sa diosnong kinaiya Niya.
- b. Bulawan ang lana mismo (Zac. 4:12), nga nagpasabot nga niagay ang bulawan ingog lana; mas daghang lana ngani ang gidugang sa tangkawan, nagpasabot kana nga mas daghang bulawan ang gidugang.
- c. Adlaw-adlaw mobayad gyod ta sa bili aron makabaton og daghan pang bulawan, dugang pa nga Dios sa diosnong kinaiya Niya, aron mahimo tang lunsayng bulawang tangkawan alang sa pagtukod sa bulawang Bag-ong Jerusalem—2 Ped. 1:4; Bug. 3:18; 1:20; 21:18; Mat. 25:8-9.
- d. Sa iaplikar nato kining butanga sa kasinatian nato karon, makita nato nga ang Espiritu nga nag-agay gikan nato mao ang Dios, ug bulawan ang Dios; busa, ipangalagad ngani nato si Cristo sa uban, sangkapan silag lana, sa pagkatinuod gisangkapan nato silag Dios; niagay ang Dios gikan nato ngadto nila—Zac. 4:12-14; Juan 7:37-39; 2 Cor. 3:3, 6, 8.
- e. Mga kahoyng olivo gyod unta tang tanan, nga nagpaagay sa Dios gikan nato ngadto sa uban; sa ingon niini ikasangkap ang lana ngadto sa mga nanginahanglan pinaagi niadtong mga kahoyng olivo nga gikan niini niagay ang Dios—Rom. 11:17; Luc. 10:34; itandi sa Juan 7:37-39.